



Summer School 2016

Studiantenan ta contento cu curso preparatorio pa HAVO 4



E graduadonan di MAVO y studiantenan di EPI ingresando na HAVO 4 p'e siguiente aña escolar ta wordo invita pa participa na un asina yama Summer School, cual ta un curso preparatorio di dos siman pa yuda nan orienta nan mes encuanto di e materianan cu ta wordo ofreci, y e nivel y dinamica di e lesnan.

Pa medio di e Summer School ta yuda e hobennan pa ta mas consciente y mihor prepara pa loke nan ta haya nan mes confronta cun'e na Colegio Arubano y Colegio San Nicolas.

E curso ta wordo ofreci pa Colegio San Nicolas, y e aña aki a tuma lugar na Scol di Arte San Nicolas.

E materianan cu a wordo instrui ta Wiskunde A, Wiskunde B, Nederlands, Engels, Natuurkunde, Scheikunde y Biologie, cual ta riba un nivel diferente cu e alumnonan di MAVO y EPI ta custumbra cun'e.

Un total di 33 alumno a participa n'e curso p'e periodo escolar 2016-2017.

Entre e alumnonan cu a participa tabatin Jean

Paul da Silva, kende a laga sa cu e curso tabata hopi bon, particularmente di e vak Wiskunde B el a bisa cu el a saca beneficio, como cu awor e sa kico e por spera di e vak aki.

E ta recomenda pa hobennan cu ta bay HAVO 4 otro aña for di MAVO of EPI pa tuma e curso, cu "ta yuda masha hopi mes".

Shaira Quetta a remarca cu e programa a nifica hopi p'e, e ta yuda e alumnonan prepara mihor pa loke ta spera nan y ta yuda tambe pa nan "no spanta" pa vaknan nobo of e contenido diferente. Sharon ta considera e curso tambe un bon manera pa "spiarta" pa prepara tempran p'e siguiente periodo escolar.

Pa Shaira Wiskunde A tabata un poco dificil, y completamente diferente na loke el a haya na MAVO.

E ta menciona cu tambe el a haya un idea di loke ta spera p'e vak Nederlands, pa cu gramatica, etc. cu tambe ta diferente n'e contenido ofreci na MAVO.

P'e alumno Melanie Richardson, Summer

School tabata un bon experiencia tambe, unda cu e sa awor kico ta bay sper'e p'e cambio no cay pisa. El a bisa cu Wiskunde no ta su mihor materia, y e curso a dun'e un impresion di e contenido, pero tambe di e forma di duna les, cual ta hopi diferente n'e forma di duna les na MAVO.

Concluyendo, Stephanie Tarra a expresa cu e Summer School tabata un experiencia unico y cu ta un experiencia cu e ta recomenda pa otro hobennan probecha di dje.

E vaknan ta bira hopi mas dificil, segun Stephanie, nan ta bira poco mas pisa den HAVO.

E ta un di e studiantenan cu ta ingresa den HAVO 4 for di EPI, y a remarca cu e curso ta un guia p'e, como cu e diferencia entre HAVO y EPI ta grandi.

Na EPI tin mas practica, y HAVO ta ful diferente y ta haci mas uzo di bukinan, "cosnan ta bira mas moeilijk" y HAVO ta rekeri cu e estudiante ta enfoca mihor.